



GIG
CYMRU
WALES

Partneriaeth
Cydwasaethau
Gwasanaethau Golchi
Shared Services
Partnership
Laundry Services

Dilynwch ni



Cylchlythyr Gwasanaethau'r Golchdy

Tachwedd 2021 | e-Gylchlythyr Rhif 1



GOLCHDY GREEN VALE YN DATHLU EI BEN-BLWYDD YN 30 OED

Yn y rhifyn hwn

DATHLU 38 MLYNEDD O WASANAETH GYDA'R
GORUCHWYLIWR GOLCHDY TONY CHEADLE

GOLCHDY: DIWEDDARIAD RHAGLEN

GOLCHDY CYMRU GYFAN DIWEDDARIAD



Cyflwyniad

Anthony Hayward,
Cyfarwyddwr Cynorthwyoly-
Golchdy a Gweithrediadau



Croeso i rifyn cyntaf cylchlythyr Gwasanaethau'r Golchdy.

Y Golchdy yw un o'r
ychydig wasanaethau sydd
â chysylltiad â'r claf trwy
gydol ei daith yn yr ysbyty.
Ar ôl dechrau fy ngyrfa fel
trydanwr gyda'r gwasanaeth
35 mlynedd yn ôl, rwy'n
gwerthfawrogi'n llwyr pa
mor hanfodol yw'r Golchdy
i weithredu llyfn y GIG yng
Nghymru.

Nod y cylchlythyr hwn yw rhoi
gwybodaeth a diweddariadau
pwysig i staff ynghylch
Gwasanaethau'r Golchdy
a gobeithiaf y byddwch yn
mwynhau ei ddarllen.

Cysylltwch â ni!

Byddwn wrth ein boddau yn
cael eich adborth a rhannu eich
profiadau.

Cysylltwch â:
darren.davies@wales.nhs.uk



Beth yw Gwasanaethau'r Golchdy a pham fod gwasanaethau golchi mor bwysig?

Ar 1 Ebrill 2021 crëwyd y Gwasanaeth Golch Cymru
Gyfan a ddarperir gan Bartneriaeth Cydwasaethau GIG
Cymru (PCGC).

Mae argaeledd lliniau glân, safonol wedi'u diheintio yn
GIG Cymru yn ofniad sylfaenol ar gyfer gofal cleifion o'r
ansawdd uchaf sy'n cyfrannu'n uniongyrchol at leoliad
diogel a chyfforddus lle y gall cleifion gael triniaeth a
gwella.

Mae gwasanaeth golchdy o safon isel na ellir dibynnu
arno yn cyfrannu at brofiad gwael i gleifion sydd, heb os,
yn difwyno canfyddiadau ar agweddau eraill o
wasanaethau'r GIG.

Mae prinder lliniau yn effeithio'n negyddol ar argaeledd
gwelyau mewn ysbytai hefyd a gall achosi oedi i
driniaethau. Mae sicrhau cyflenwad rheolaidd o liniau
glân a diogel, wedi'u diheintio, yn amlwg yn hanfodol i
alluogi gwasanaethau GIG Cymru i weithredu'n
llwyddiannus.

Ymhle mae Gwasanaethau'r Golchdy?

Ar hyn o bryd, mae Gwasanaethau'r Golchdy wedi'u
rhannu ar draws 3 safle gwahanol:

- Golchdy Llansamlet, De-orllewin Cymru
- Green Vale, De-ddwyrain Cymru
- Ysbyty Glan Clwyd, Gogledd Cymru.

Ar 1 Hydref, daeth y ddau olchdy yn Hywel Dda yng
Nglangwili ac yng Nghwm Taf Morgannwg ym Mhentref
Eglwys, fel ei gilydd, yn rhan o Wasanaeth Golch
Cymru Gyfan a ddarperir gan PCGC. Bydd y ddau
olchdy yn parhau i ddarparu gwasanaeth golchi rhagorol
i'w cwsmeriaid presennol, ond byddant hefyd yn gwneud
hynny fel rhan o Wasanaeth Golch Cymru Gyfan.





GOLCHDY GREEN VALE YN DATHLU EI BEN-BLWYDD YN 30 OED

Ar 9 Hydref 2021, cyrhaeddodd Golchdy Green Vale 30 mlynedd o wasanaeth parhaus yn swyddogol. Wedi'i leoli ar safle Ysbyty newydd Athrofaol y Faenor yng Nghwmbrân, De-ddwyrain Cymru, agorwyd y golchdy'n swyddogol yn 1991 gan Mr Geoffrey Canning, Cadeirydd Cyngor Hyfforddi a Menter Gwent. Dechreuodd ei fywyd dan reolaeth Awdurdod Gwasanaethau Cyffredin Iechyd Cymru cyn symud at Ymddiriedolaeth GIG Glan Hafren ac yna Ymddiriedolaeth GIG Gofal Iechyd Gwent ar 1 Ebrill 1999.

Arhosodd Green Vale o dan reolaeth yr Ymddiriedolaeth ac yna Bwrdd Iechyd Prifysgol Aneurin Bevan nes trosglwyddo i Bartneriaeth Cydwasaethau GIG Cymru ar 1 Ebrill 2021.

Yn ystod ei 30 mlynedd, mae'r golchdy wedi prosesu dros 330 miliwn o eitemau o liain sy'n cynnwys cynfasau gwely, casys gobennydd, tywelion, gynau llawdriniaeth a siwtiau sgryps ac mae wedi defnyddio'r hyn sy'n cyfateb i 374 o byllau nofio maint Olympaidd o ddŵr yn y broses olchi.

Mae cyflenwad o liain glân sydd ar gael yn rhwydd yn hanfodol i ddarparu gofal diogel i gleifion. Y golchdy yw un o'r ychydig wasanaethau sydd â chysylltiad â'r claf trwy gydol ei daith yn yr ysbyty. O wisgo gŵn llawdriniaeth cyn triniaeth feddygol i dreulio noson mewn gwely ysbyty, mae'r golchdy yn wasanaeth hanfodol ond yn un sy'n cael ei anghofio yn aml yn GIG Cymru.

Dim ond un aelod o staff sy'n dal i fod yn Green Vale o'r diwrnod agoriadol ym 1991, sef Tony Cheadle, Goruchwyliwr Golchdy, a ddechreuodd ei yrfa yng Ngolchdy St Woolos ar 14 Chwefror 1983 cyn trosglwyddo i Green Vale pan agorodd ym 1991.

Mae Tony wedi gweld llawer o newidiadau dros y blynyddoedd, ond mae'n edrych ymlaen yn arbennig at weld y buddsoddiad a'r newidiadau yn Green Vale fel rhan o Raglen Drawsnewid Golchdy PCGC.

Fel rhan o yrfa 38 mlynedd Tony dyfarnwyd tancard coffa arbennig iddo a gyflwynwyd gan y Cyfarwyddwr Caffael a'r Gwasanaeth Negesydd Iechyd, Jonathan Irvine (yn y llun isod).



Bu staff y golchdy hefyd yn dathlu pen-blwydd Green Vale gydag aelodau eraill o Uwch Dîm Arwain PCGC (yn y llun uchod) gan gynnwys Neil Frow, y Rheolwr Gyfarwyddwr; Anthony Hayward, Cyfarwyddwr Cynorthwyol y Golchdy a Gweithrediadau; Peter White, Rheolwr Gwasanaethau Golchdy; Ian Rose, Pennaeth Swyddfa Rheoli Prosiect PCGC ac Alwyn Hockin, Cynullydd Unsain.

Mae cynlluniau cyffrous ar gyfer y gwasanaeth golchdy a fydd yn cael eu cychwyn dros y 18 mis nesaf. Bydd y safle'n cael ei adnewyddu a'i uwchraddio gydag offer a pheiriannau newydd i ddarparu gwasanaeth lliain modern i'r GIG yn Ne-ddwyrain Cymru. I 30 mlynedd nesaf Green Vale!

Ar ben-blwydd Golchdy Green Vale, dywedodd Anthony Hayward, Cyfarwyddwr Cynorthwyol Gwasanaethau Golchdy a Gweithrediadau; "Ar ôl dechrau fy ngyrfa yng Ngolchdy Ysbyty Sant Gwynllyw 35 mlynedd yn ôl fel prentis trydanwr, mae'n deimlad o falchder mawr fod yn rhan o dîm y golchdy eto, yn arbennig yn y cyfnod hwn o drawsnewid y gwasanaeth. Dylem fod yn falch iawn o'r cyflawniadau yn ystod y 30 mlynedd diwethaf ac edrychwn ymlaen at y dyfodol gyda llawer iawn o gyffro."

Dywedodd y Rheolwr Golchdy, Peter White; "Rwy'n falch iawn o'r tîm yma yn Green Vale sy'n darparu gwasanaeth hanfodol i GIG yn Ne-ddwyrain Cymru. Mae dyfodol disglair iawn i'r golchdy gyda buddsoddiad sylweddol ar y gweill fel rhan o'r Rhaglen Trawsnewid Golchdy. Rydym i gyd yn edrych ymlaen at weld adnewyddu'r golchdy a'r uwchraddiadau y bwriedir iddynt symud Green Vale ymlaen am y 30 mlynedd nesaf."



Gwnaed cacen arbennig i ddathlu penblwydd Green Vale yn 30 oed



Golchdy Green Vale,
Cwmbrân



DOD I'CH ADNABOD CHI: SGWRS GYDA'N CYDWEITHWYR LEDLED CYMRU YNG NGWASANAETHAU'R GOLCHDY



Ers trosglwyddo Gwasanaethau'r Golchdy i PCGC, rydym wedi siarad â nifer o'n staff ardderchog mewn safleoedd ledled Cymru i ddarganfod pwy ydyn nhw, yr hyn maen nhw'n ei wneud a sut maen nhw'n gweithio....

Enw: David Jones

Galwedigaeth: Rheolwr Peirianeg y Golchdy

Safle'r Golchdy: Green Vale

Blynnyddoedd mewn gwasanaeth: 16 mlynedd

Dechreuais yng Ngolchdy Green Vale yn 18 mlwydd oed fel prentis peirianeg aml-sgil yn 2005, gan weithio wrth gynna fy ngyrfa addawol yn bocsio y tu allan i'r gwaith. Yn anffodus, daeth fy ngyrfa yn bocsio i ben, ond aeth fy ngyrfa ym myd peirianeg o nerth i nerth.

Roedd dechrau fel prentis wedi rhoi'r cyfle i mi gael dealltwriaeth lawn o sut mae golchdy yn gweithio ac yn gweithredu, sydd wedi bod yn brofiad amhrisiadwy yn fy ngyrfa ers hynny.

Ers cwblhau fy mhrentisiaeth a gweithio yn y golchdy fel peiriannydd cwbl gymwys, rydw i wedi cael y cyfle i weithio gyda rhai o'r offer golchdy gorau sydd ar gael mewn golchdai diwydiannol. Mae fy ngyrfa wedi arwain at gael fy mhenodi'n Rheolwr Peirianeg y Golchdy ar gyfer Green Vale, sy'n un o fy nghyflawniadau balchaf.

Rydw i'n edrych ymlaen at rannu rhywfaint o'r wybodaeth a'r profiad rydw i wedi'i ennill gyda phrentisiaid a pheirianwyr newydd y byddwn ni'n eu croesawu yma yn y dyfodol.

Mae cael dealltwriaeth o anghenion golchi ar ôl treulio fy holl yrfa ym myd peirianeg mewn golchdy ysbyty hefyd wedi rhoi'r cyfle i mi ymgynghori â rhai o'r cwmnïau arweiniol sy'n cynhyrchu offer golchi ar draws y byd.

Mae trosglwyddo i PCGC wedi rhoi cyfle i mi fod yn rhan o ddatblygu golchdai newydd, sy'n rhywbeth nad ydw i wedi'i brofi yn fy ngyrfa hyd yma, ond rydw i'n edrych ymlaen at fwrw ymlaen â hyn a gallu rhannu fy arbenigedd.

Er i fy ngyrfa yn y byd bocsio ddod i ben yn rhy gynnar, rydw i'n falch o ddweud na wnaeth fy ngyrfa ym myd peirianeg, ac i'r Golchdy y mae'r diolch am hyn.



David Jones



Joyce Davies

Enw: Joyce Davies

Galwedigaeth: Cynorthwydd Gwasanaethau Llieiniau

Safle'r Golchdy: Gwasanaethau'r Golchdy Gogledd Cymru

Blynyddoedd mewn gwasanaeth: 40 mlynedd

Helo, fy enw i yw Joyce Davies ac rydw i wedi bod yn gweithio fel gweithredwr llieiniau yng Ngogledd Cymru ers mis Tachwedd 1982. Rydw i'n byw gyda fy mab Jack, tua 8 milltir o'r Golchdy ger Dinbych.

Dechreuais weithio fel Cynorthwydd Gwasanaethau'r Golchdy ar brofiad gwaith pan oeddwn yn 16 mlwydd oed.

Yn ystod fy mhrofiad gwaith a barodd 6 mis, dysgais bwysigrwydd bod yn Gynorthwydd Gwasanaethau'r Golchdy yn y Golchdy gan fod gennym gyfrifoldeb dros brosesu a darparu llieiniau glân i'r holl ysbytai aciwt a chymunedol ar draws Gogledd Cymru ar gyfer anghenion cleifion. Mwynheais weithio yn y rôl hon a gwnes i gais am swydd barhaol.

Rydw i wedi gwneud llawer o ffrindiau ac rydw i wedi gweld newid i'r Golchdy yn ystod fy amser yma. Rydw i'n falch o'r ffordd y mae pob un ohonom wedi addasu i'r heriau rydyn ni wedi'u hwynebu gyda'r pandemig cyfredol a'r effaith mae hyn wedi'i chael ar ein gwasanaeth.

Rydyn ni i gyd wedi bod yn weithwyr allweddol yn ystod y cyfnod anodd hwn ac rydyn ni wedi gweithio drwy gydol y pandemig fel tîm i sicrhau parhad y gwasanaeth.

Rydw i'n hapus y byddaf yn dathlu fy 40 mlynedd o wasanaeth ar 15 Tachwedd 2022, ac rydw i'n edrych ymlaen at weld datblygiad newydd Golchdy Gogledd Cymru ac at fod yn rhan o dîm ehangach gyda golchdai eraill yn PCGC.

Enw: Ellen Martin

Galwedigaeth: Cynorthwydd Gwasanaethau Llieiniau

Safle: Golchdy Llansamlet

Blynyddoedd mewn gwasanaeth: 14 mlynedd

Dechreuais weithio i'r GIG yn gyntaf yn 2006 fel gweithiwr asiantaeth yn Ysbyty Hill House yn Abertawe. Yn 2007, cefais swydd barhaol. Cyn hyn, roeddwn i'n gweithio yn y Windsor Café. Mae'n bosibl y bydd rhai ohonoch chi'n cofio'r lle am y pysgod a'r sglodion hyfryd ar Stryd Cradock yng nghanol dinas Abertawe. Er cymaint yr oeddwn i'n mwynhau gweithio yno, cefais y cyfle i gael gyrfa yn y GIG a dydw i ddim yn difaru gwneud hynny o gwbl.

Roedd Ysbyty Hill House yn lle unigryw. Roedd yn adeilad bach hen ffasiwn gyda phum ward yn unig i gyd. Roeddwn i a llawer o bobl eraill yn dwlu ar y lle, a bûm yn lwcus i fod wedi gweithio yno am 5 mlynedd fel Cynorthwydd Llieiniau, gan ddarparu llieiniau o gwmpas y wardiau. Yn anffodus, caeodd Ysbyty Hill House am byth yn 2011. Ychydig a wyddwn mai megis dechrau oedd fy nhaith yn y GIG. Es i i weithio yn Ysbyty Cefn Coed yn Ngolchdy Baywash am dros flwyddyn cyn symud ymlaen i Ysbyty Treforys i weithio yn yr ystafell llieiniau eto, gan roi'r llieiniau yn ôl ar y wardiau.

Ar ôl rhai blynyddoedd yn gweithio'n rhan-amser ac yn gofalu am aelodau o'r teulu, daeth yr amser lle gallwn newid fy oriau i gyflogaeth amser llawn, a dyna pryd dechreuais i weithio yng Ngolchdy Llansamlet.

Mae'n rhaid i mi ddweud, roedd yn sioc i'r system gan fod cymaint o amser wedi bod ers i mi fod ar lawr ffatri (25 mlynedd!). Meddyliais na fyddwn i'n para chwe diwrnod, heb sôn am chwe blynedd, hyd nes i mi gwrdd â'r holl staff yno. Maen nhw'n parhau i gyflenwi safon dda iawn o lieiniau ac yn ateb y galw a'r cyflenwadau gymaint â phosibl gyda balchder, chwerthin a hwyl, ac maen nhw bob amser yno i gefnogi ei gilydd. Os oes angen sgwrs gyfeillgar neu gymorth ar unrhyw un, rydyn ni bob amser yn helpu ein gilydd gyda thosturi a, chwe blynedd yn ddiweddarach, dyna rydw i'n ei ddwlu am y lle.

Ym mis Ebrill 2021, symudon ni i PCGC ac rydyn ni eisoes wedi gweld nifer o newidiadau cyffrous. Yn ogystal, rydw i wedi cael y cyfle i ddod yn hyrwyddwr llesiant sefydliadol, ac rydw i wir yn mwynhau fy swydd. Rydw i'n edrych ymlaen yn arw at y dyfodol gyda fy nghydweithwyr a Phartneriaeth Cydwasanaethau GIG Cymru.

Ellen Martin



DATHLU 38 MLYNEDD O WASANAETH GYDA TONY CHEADLE GORUCHWYLIWR GOLCHDY



Tony Cheadle Goruchwyliwr
Golchdy...heddiw!

Fel rhan o ddathliadau 30 oed Golchdy Green Vale, cawsom gyfle i ddal i fyny gyda Tony Cheadle Rheolwr y Golchdy sy'n dathlu 38 mlynedd o wasanaeth parhaus gyda Gwasanaethau'r Golchdy GIG Cymru.

Mae Tony wedi gweld llawer o newidiadau yn ystod ei yrfa wedi iddo weithio mewn gwahanol rolau ar draws nifer o leoliadau, gan addasu at arferion newydd wrth i bethau fynd yn eu blaenau.

Mae Tony yn amlwg yn falch o'r hyn mae'n ei wneud ac fe gymerodd amser i siarad â ni a myfyrio ar ei yrfa a dweud ei hanes.

Dechreuais fy ngyrfa ar Ddydd Sant Ffolant, 14 Chwefror 1983 fel cynorthwydd golchdy yng Ngolchdy Ysbyty Sant Gwynllyw, Casnewydd. Roedd yn rôl heriol gyda dim ond pum aelod o staff (yn fy nghynnwys i) yn gwneud y broses golchi gyfan, oedd yn cael ei wneud â llaw yn llwyr, neu'r yr oeddem yn ei alw'n 'gwneud peli â llaw' - roedd yn waith caled ac yn aml yn afiach - pellter byd o'r systemau awtomatig sydd gennym heddiw.

Ar ôl bron i 8 mlynedd yn Ysbyty Sant Gwynllyw, symudais i Olchdy Green Vale yn 1990. Ar y pryd, ystyriwyd mai'r golchdy hwn oedd y golchdy mwyaf modern yn Ewrop. Yn 1995, cefais ddyrchafiad i oruchwyliwr yn gyfrifol am galendrau, cyn symud i'm rôl bresennol ac rwy' wedi'i wneud am yr ugain mlynedd diwethaf.

Wrth edrych yn ôl, hoffwn ddiolch i Garth Phillips, fy Rheolwr Golchdy cyntaf, am fy rhoi ar ben fy nhaith gyrfa, yn ogystal â Pat Jordon, y Rheolwr Cynorthwyol blaenorol, yn Ysbyty Sant Gwynllyw hefyd. Roedd Pat yn gymeriad 'dim ffwdan' ac roedd yn helpu i ddysgu'r gwerthoedd sy'n parhau i fod yn bwysig i mi.

Wrth drosglwyddo Gwasanaethau'r Golchdy i'r Bartneriaeth Cydwasanaethau a gweld rhywfaint o'r buddsoddiadau sydd eisoes wedi'u gwneud, rwy'n rhagweld cyfnod cyffrous o'n blaenau. Rwy'n edrych ymlaen yn fawr at y cyfnod nesaf yn fy ngyrfa - er nad ydw i'n barod i ymddeol....eto!



Tony Cheadle....tua 1983



Yn ddiweddar, cafodd Raglen Drawsnewid y Golchdy (LTP) Asesiad Strategol - Adolygiad Porth.

Beth yw Adolygiad Porth?

Mae'r broses Porth yn archwilio rhaglenni a phrosiectau ar adegau penderfyniad allweddol ar eu teithiau ar ran yr Uwch Swyddog Cyfrifol (SRO). Mae'n edrych ymlaen at ddarparu sicrwydd fel y gallent wneud cynnydd i'r cam nesaf yn llwyddiannus.

Mae Adolygiadau Porth yn rhoi 'adolygiad gan gymheiriaid' pan fydd ymarferwyr annibynnol o'r tu allan i'r rhaglen/prosiect yn defnyddio eu profiad ac arbenigedd i archwilio'r cynnydd a'r tebygolrwydd o ddarparu'r rhaglen neu'r prosiect yn llwyddiannus.

Mae'r adolygiad yn defnyddio cyfres o gyfweiliadau, adolygiadau dogfennaeth a phrofiad y timau i roi safbwyntiau ychwanegol a gwerthfawr ar faterion y mae tîm y prosiect yn eu hwynebu, a her allanol i gadernid y cynlluniau a'r prosesau.

Beth yw'r manteision?

Mae rhaglenni a phrosiectau yn rhoi dull pwysig o ddarparu nodau'r llywodraeth yn effeithlon ac yn amserol. Felly, mae gwariant caffael trwy raglenni a phrosiectau yn gyfran sylweddol, sydd ar gynydd, o gyfanswm gwariant llywodraeth.

Mae rheoli rhaglenni a phrosiectau yn dda ac effeithiol, felly, yn hanfodol i ddarparu amcanion yn llwyddiannus. Cynllunir y Broses Porth i roi canllawiau annibynnol i Uwch Swyddogion Cyfrifol, timau rhaglenni a phrosiectau ac i'r adrannau sy'n comisiynu eu gwaith am y ffordd orau i sicrhau y bydd eu rhaglenni a'u prosiectau'n llwyddiannus.

Beth oedd y canlyniad?

Mae'r Adolygiad Porth yn pennu Asesiad Hyder Darparu yn seiliedig ar statws RAG Gwyrdd, Oren/Gwyrdd; Oren; Oren/Coch neu Goch.

Mae Rhaglen Drawsnewid y Golchdy (LTP) wedi cael ei asesu'n Oren/Gwyrdd sy'n nodi bod darpariaeth llwyddiannus yn debygol. Fodd bynnag, bydd angen sylw cyson er mwyn sicrhau nad yw risgiau'n troi'n faterion mawr sy'n bygwth y ddarpariaeth. Mae hyn yn radd cadarnhaol iawn ar gyfer yr Adolygiad Porth cyntaf.

Mae cyfres o argymhellion wedi'u cynnwys yn yr Adolygiad Porth ac fe gymeradwywyd hwy gan Fwrdd y Rhaglen. Byddant yr argymhellion hyn yn cael eu gweithredu yn ystod yr ychydig fisoedd nesaf a byddant yn helpu i gryfhau darpariaeth y rhaglen a hyder yng nghadernid y cynlluniau a'r prosesau. Disgwylir yr Adolygiad Porth - Strategaeth Darpariaeth nesaf yn gynnar yn 2022.

DIWEDDARIAD RHAGLEN GOLCHI CYMRU GYFAN

Sefydlu Tîm y Prosiect

Mae Tîm Rhaglen Golchdy Cymru Gyfan bellach yn gweithio gyda'n partneriaid contractiwr er mwyn dylunio gwednewidiad Greenvale yn llawn ac i gasglu'r holl fanylion sydd eu hangen ar gyfer y ddau olchdy newydd yng Ngogledd Cymru ac yn Ne-orllewin Cymru. Mae'n cynnwys dethol Partner Cadwyn Gyflenwi - Tilbury Douglas i ddylunio ac adeiladu'r golchdai newydd ac adnewyddu Green Vale.

Ymweliadau â'r Golchdai a'r Cyflenwyr

Daethon ni â'r cylch o ymweliadau â chyflenwyr i ben ym mis Awst a bu'n llwyddiant ysgubol. Cafodd timau prosiect, ochr y staff a chynllunwyr, ynghyd â phersonél PCGC i gyd gyfleoedd i ymweld â golchdai ledled y wlad er mwyn iddynt lunio barn am yr hyn y dylai ein cyfleusterau Golchdy'r GIG eu cynnwys a bydd yn ein helpu i asesu rhai o'r cyflenwyr a'u cyfarpar. Arweiniodd yr arbenigwyr golchdai LTC, sef ein cynghorwyr ar y rhaglen hon, yr ymweliadau hyn ac maent wedi sicrhau bod yr holl wersi a ddysgwyd wedi'u casglu ac yn cael eu rhoi ar waith mewn ffordd effeithiol.

Dewis Safle

Fel y'i cymeradwywyd yn Achos Busnes y Rhaglen y llynedd, dewiswyd tri safle ar gyfer Gwasanaethau Golchdy GIG Cymru. Y safleoedd a ddewiswyd oedd:

- Green Vale (Hwb De-ddwyrain) yn amodol ar ei adnewyddu
- Safle newydd i'w ddewis yn Rhanbarth y De-orllewin yn agos at y cyfleuster presennol
- Safle newydd i'w ddewis yn Rhanbarth y Gogledd yn agos at y cyfleuster presennol.

Mae tîm y rhaglen yn falch iawn o gyhoeddi bod cynnydd mawr wedi'i wneud o ran dewis safleoedd. Mae defnyddio meini prawf dylunio yn seiliedig ar gynigion arbenigwyr, cynlluniau offer posibl yn y dyfodol, pellteroedd teithio staff a gwybodaeth gan y gweithdy defnyddwyr (a gafwyd ym mis Awst gan weithlu golchi dillad PCGC) wedi arwain at ddewis y safleoedd hyn a ffefrir yn llwyddiannus.

Mae sesiynau ymgysylltu â defnyddwyr golchi dillad hefyd wedi bod yn ddefnyddiol iawn ac maent wedi helpu'r tîm i ddarganfod gofynion defnyddwyr golchi dillad PCGC gan ein galluogi i nodi meini prawf allbwn cwsmeriaid a mesur barn rheng flaen ynghylch sut olwg ddylai fod ar y cyfleusterau i ddefnyddwyr a'r amodau golchi dillad. Dewiswyd safleoedd a ffefrir o ganlyniad uniongyrchol i'r holl waith caled hwn. Er nad ydyn nhw wedi eu sicrhau eto, ac er eu bod yn ddarostyngedig i ganiatâd cynllunio a newidiadau y tu hwnt i'n rheolaeth, gallwn gyhoeddi, ynghyd â Green Vale, mai'r safleoedd canlynol bellach yw'r "safleoedd a ffefrir" ar gyfer Golchdy Cymru gyfan ac y byddant yn destun craffu a chymeradwyo'r achosion busnes, sef:

Rhanbarth y De-orllewin: Millstream Way
Tir yn Millstream Way, Bro Abertawe, Abertawe

Gogledd Cymru: Parc Cyflogaeth Tir Llwyd
Tir ym Mharc Cyflogaeth Tir Llwyd, Bae Cinmel, Y Rhyl.

Mae'r ddau safle hyn yn safleoedd sydd newydd gael eu hadeiladu ac nid oes cyfyngiadau o ystyried yr adeiladau na'r cyfleusterau sydd eisoes wedi'u hadeiladu arnynt.

Amserlen a chamau'r rhaglen

Mae Tîm y Prosiect bellach yn brysur iawn yn casglu'r holl ddata sydd eu hangen i alluogi dyluniad cadarn ac effeithlon ar gyfer adeiladu a chyfarpar golchdy. Bydd y manylion yn galluogi cytuno ar gynlluniau a chasglu costau gan y cyflenwyr. Yna, bydd yr wybodaeth hon yn cael ei chynnwys yn y tri achos busnes i'w cymeradwyo. Bydd grwpiau defnyddwyr, peirianwyr golchdy a rheolwyr safle yn gallu gwneud sylwadau a chael trafodaethau ynghylch y dyluniad pan gawn y cynigion cychwynnol gan gyflenwyr y golchdy. Bydd hyn yn hwyr yn 2021 / yn gynnar yn 2022. Mae llinellau amser y rhaglenni bellach yn cael eu cytuno arnynt ac rydym yn rhagweld y bydd yr achosion busnes yn cael eu cwblhau ac y bydd yr holl waith a'r manylion yn barod i'w hadolygu yn Chwarter 1 2022. Yna, bydd angen cymeradwyaeth lawn Llywodraeth Cymru ar yr achosion busnes amlinellol. Os cânt eu cymeradwyo, gallwn wedyn symud y cynigion ar gyfer y safleoedd newydd i'r cam nesaf tra hefyd dechrau'r gwaith adnewyddu yn Green Vale unwaith y bydd cyllidebau wedi'u cytuno a'u rhyddhau.



GIG
CYMRU
NHS
WALES

Partneriaeth
Cydwasaethau
Shared Services
Partnership

Dyluniwyd gan Dîm Cyfathrebu PCGC